

華陽國志

冊三

卷一 國朝

一

華陽國志卷第十下

漢中士女

鄭真岳峙確乎其清

鄭子真褒中人也玄靜守道履至德之行

乃其人也教曰忠孝愛敬天下之至行也神中五徵帝王之要道

也成帝元舅大將軍王鳳備禮聘之不應家谷口世號谷口子真

云漢中與立祠

舊校正云神中五徵未詳其義

衛梁泥盤玄湛淵亭

衛衡字伯梁南鄭人也少師事隱士同郡

樊季齊以高行聞郡九察孝廉公府州十辟公車三徵不應董扶

任安從洛還過見之曰京師天下之市朝也足下猶之人耳何其

在遠以虛名屢動徵書若至中國則價盡矣衡笑曰時有險易道

有污隆若樊季齊楊仲桓雖應徵聘何益於時乎苟無所則尼軻

栖栖是以君平子真不屈其志豈子之徒也哉吾何虛假之有安

扶服之敬其言也

鄧公亢對忠枉原情

鄧公成固人也景帝時御史大夫晁錯患

諸侯強大建議減削會吳楚七國謀反假言誅錯故吳相袁盎譖  
帝殺之拜盎太常使赦七國七國遂叛鄧公爲謁者入言軍事帝  
問曰七國聞晁錯死罷兵不對曰吳王卽山鑄錢煮海爲鹽謀反  
積數十年錯患之故欲削弱爲萬世策諸侯憂之計畫始行身死  
東市諸侯莫憚內杜忠臣之口外爲諸侯報怨臣竊爲陛下不取  
也帝嘆息曰吾亦恨之武帝初爲九卿

博望致遠西南來庭

張騫成固人也爲人強大有謀能涉遠爲

武帝開西域五十三國窮河源南至絕遠之國拜校尉從討匈奴  
有功遷衛尉博望侯於是廣漢緣邊之地通西南之塞豐絕遠之  
貨令帝無求不得無思不服至今方外開通騫之功也

子游師生讒巧所傾

張猛字子游騫孫也師事光祿勳周堪以

光祿大夫給事中侍元帝帝當廟祭濟渭欲御樓船御史大夫薛

廣德當車免冠乞頸血污車輪陛下不得廟祭矣帝色不悅猛進曰主聖則臣直今乘船危就橋安聖主不乘危故大夫言之帝曰曉人不當如是也後與周堪俱以忠正爲幸臣弘恭石顯所譖毀乍出乍徵堪平和猛卒自殺

王孫養性矯葬厲生

楊王孫成固人也治黃老家累千金厚自

奉養臨終告其子曰我死裸葬以復吾真但爲布囊盛尸入地七尺既下從足脫之以身親土其子不忍見王孫友人祈侯諫之王孫曰厚葬無益死者也夫儻財送死今日入明日發此真無異暴骸中原裹以幣帛隔以棺槨含以珠玉後腐朽乃得歸土不可故吾欲早就真宅祈侯無以易卒裸葬如其言

司徒監使術暢思精屢登上司七政是經

李郃字孟節南鄭人

也少明經術爲郡候吏和帝使者二人微行至蜀宿郃舍郃爲出酒夜飲露坐郃問曰君來時寧知二使何日發來耶二人怪問

之郤指星言曰有二使星入益部後一人為漢中太守命為功曹  
察孝遂馳名為尚書郎徙左丞稍遷至尚書僕射尚書令拜司空  
又進司徒清公直亮當世稱名順帝世薨

炎精下頹朱明不揚太尉饗諤任國救荒濯日暘谷將升扶桑惡直  
醜正漢道遂喪 李固字子堅郃子也陽嘉三年以對策忠亢拜

議郎大將軍梁商后父也表為從事中郎授荊州刺史直州部有

亂至州先友其賢者南陽鄭叔躬宋孝節零陵支宜雅表薦長沙

桂陽太守趙歷卒

當作辛

已奏免江夏南

按此下當脫陽南二字南陽太守高賜也見後漢書

王固本

傳 郡太守孔疇高賜為昆

舊校云為昆疑誤今按為姓名南郡太守也見廣韻為字下引風俗通

二云漢有南郡太守為昆舊校失之遠矣

等州土自然安靜徙太山太守克寧盜賊入

為將作大匠多致海內名士南陽樊英江夏黃瓊廣漢楊厚會稽

賀純光祿周舉侍中杜喬陳留楊倫河南尹存東平王惲陳國何

臨清河房植等皆蒙徵聘轉大司農順帝崩太后臨朝拜太尉與

后弟大將軍梁冀太傅趙峻並錄尚書沖帝崩時徐揚有盜賊太后欲不發喪須召諸王至固爭不可言國家多難宜立長君太后欲專權乃立樂安王爲質帝質帝崩太后復與梁冀謀所立固與司徒南郡胡廣司空蜀郡趙戒書與冀引周勃霍光立文宣以安漢之榮閹鄧廢立之禍言國統三絕期運厄會與崩之漸在斯一舉宜求賢王親近不可寢嘿也冀得書召公卿列侯議所立三公及鴻臚杜喬僉舉清河王蒜冀然之奏御太后中常侍曹騰私恨蒜說冀明日更議廣戒從冀固與喬必爭蒜宜立中興才也且年長識義必有厚將軍冀不聽策免固喬歲餘取下獄以無事出之京師市邑皆稱千萬歲冀惡其爲人所善更奏繫之固書與二公曰吾欲扶持漢室使之比隆文宣何圖梁將軍迷謬諸子由從以吉物爲凶成事爲敗漢家衰微從是始矣將軍亦有不利吾雖死上不慚於天下不愧於人求義得義死復何恨遂自殺二公得書

惟自流涕士民咸哀哭之桓帝無道冀尋受誅漢家遂微政在闕  
宦無不思固也

元脩敦重威惠實亮

張則字元脩南鄭人也為梓柯太守威著

南土永昌越巂夷謀欲反畏則換臨其郡相諫而止號曰臥虎以

戍狄勳遷護羌校尉徵拜扶風又換臨桂陽皆平盜賊巴郡板楯

反拜隆集校尉鎮漢中徙梁州刺史又為魏郡太守所在稱治靈

帝崩後大將軍袁紹表為長史不就丞相曹公拜度遼將軍

子雅温恭見察文方

趙宣字子雅南鄭人也出自寒微以温良

博雅太守犍為楊文方深器異之遂察孝廉官至犍為太守

二珪琬琰三辰懸望

趙瑤字元珪琰字稚珪凡七兄弟宣子也

皆以令德著聞瑤少有公望瑤

當

始為緱氏袁趙二公相與書曰

趙瑤在緱氏猛虎歸迹百里均耳

當作爾升按爾句絕讀升下屬也

平何難遷

扶風太守徙蜀郡司空張温謂之曰昔第五伯魚從蜀郡為司空



掃吾第以侍足下矣瑤曰諾尋換廣漢卒琰始爲青州刺史部下  
清肅徒梁相徵拜尙書不就卒

仲卿報友行義以理

陳綱字仲卿成固人也少與同郡張宗受

學南陽以母喪歸宗爲安衆劉元所殺綱免喪往復之值元醉臥  
還須醒乃煞之自拘有司會赦免三府並辟舉茂才拜弘農太守  
初至有兄弟自相責引退是後無訟者在官九年卒天子痛惜賜  
家錢四十萬

伯度玄鏡榮辱屑己

李法字伯度南鄭人也桓帝時爲侍中光

祿大夫數亢表宦官太盛椒房太重史官記事無實錄之才虛相  
褒述必爲後笑帝怒免爲庶人恬然以咎失爲己責久之徵拜汝  
南太守遷司隸校尉湛然無自得之容

德公在林懸象垂晷旣冲雲清荀張儀淮

李燮字德公太尉固

子也父死時二兄亦死燮爲姊所遣隨父門生王成亡命徐州傭

酒家酒家知非常人以女妻之延熹二年梁冀誅後日經陽道暈  
五車史官上書昔有大星升漢而西捲舌揚芒迫月熒惑犯帝座  
則有大臣枉誅星在西方大尉固應之今暈如之宜有赦命錄其  
遺嗣以除此異於是下赦燮得返舊四府並辟公車徵議郎與趙  
元珪潁川賈偉節荀慈明張伯慎爲友伯慎爲潁川太守與慈明  
交相論言偉節與焉京師以爲臧否伯慎問趙元珪曰德公所言  
何元珪曰無言也伯慎追嘆曰當如德公兒輩徒靡沸耳慈明亦  
寤而心變拜東平相王爲黃巾所沒得出天子復封之燮以爲不  
可果敗遷京兆尹時人爲之語曰李德公父不欲立帝子不欲立  
王

伯臺處諫師言亢盡末命防萌妙覩玄揆

陳雅字伯臺成固人

也靈帝時爲諫大夫闞宦用事上疏曰昔孝和帝與中常侍鄭衆  
謀誅大將軍竇憲由是宦官秉權安帝幼沖和熹太后兄大將軍

鄧騭輔政太后適崩中常侍江京等殺騭安帝登遐黃門孫程又殺車騎將軍閻顯孝桓帝又與中常侍單超等共誅大將軍梁冀陛下卽祚太傅陳蕃大將軍竇武尙書令尹勳等欲誅宦官絕其奸擅盡忠王室建萬世策機事不密爲中常侍朱瑀等所殺此卽陛下所見今宦官強盛威傾人主天下鉗口莫敢言者海內怨望妖孽並作四方兵起萬姓辛苦陛下尙可以安柰後嗣何帝不省納出爲巴郡太守年七十五卒臨終戒其子曰期運推之天下將大亂雄夫力爭無以貨財爲意吾亡依山薄葬亡歲餘靈帝崩大將軍何進復爲黃門所殺海內果亂終成三國也

孟度邵允

閻憲字孟度成固人也名知人爲縣竹令以禮讓爲

化民莫敢犯男子杜成夜行得遺物一囊中有錦二十五匹求其主還之曰縣有明君何敢負其化童謠歌曰閻尹賦政旣明且昶去苛去辟動以禮讓遷蜀郡吏民涕泣送之以千數

季子英瑋

李歷字季子太尉固從弟也少脩文學性行清白與

鄭康成陳元方齊名弱冠拜新城令朝請都督

計君經算

程苞字元道南鄭人也光和二年前上計吏時巴郡板

楯反軍旅數起征伐頻年天子患之訪問益州計考以方略苞對  
言板楯忠勇立功先漢爲帝義民羌入漢中輒蒙其力東征南戰  
世有功勞由不料卹以致叛亂非有僭盜能相羣殺大兵臨之未  
必卒得不如但選明能太守恩信懷服自然安定矣天子從之卒  
如其言後在道卒

元靈斐斐

祝龜字元靈南鄭人也年十五遠學汝潁及太學通

博蕩達能屬文太守張府君奇之曰吾見海內士多矣無如祝龜  
者也州牧劉焉辟之不得已行授葭萌長撰漢中耆舊傳以著述

終

禮高殉名

段崇字禮高南鄭人也太守河閒鄭廡命爲主簿永

初四年涼州羌反盜入漢中從廛屯褒中虜東攻廛欲戰崇諫不可願固壘待之廛不聽出戰敗績崇與門下吏王宗原展及子勃兄子伯生推鋒死戰衆寡不敵崇等皆死羌遂得廛殺之

伯義死節

按當作節死誤倒

程信字伯義南鄭人也時爲功曹居守馳

來赴難殞殮喪送還鄉里訖乃結故吏冠蓋子第二十五人誓共報羌各募敢死士以待時太守鄧成命信爲五官元初二年虜復來信等將其同志率先奮討大破之信被八創死天子咨嗟元初五年下詔書賜信崇家穀數千斛

四行齊致在茲六子

讚閣憲已下也又有王宗原展及嚴孳李

容姜濟陳已曹廉勾矩劉旌九人皆以令義爲鄭廛所命王宗原展與廛同死孳容等七人與信共并命詔書旣賜崇信家又賜九子家穀各五百斛給死事復

元侯趙陳蓋亦烈士

燕郊字元侯趙嵩字伯高南鄭人也陳調

字元化仲卿孫也邠爲刺史郤儉從事使在葭萌與從事董馥張胤同行儉爲黃巾賊王饒趙播等所殺邠聞故哀慟說馥胤赴難二子不可邠歎曰使君已死用生何爲獨死之牧劉焉嘉之爲圖象學官誅馥等嵩事太守蘇固固爲米賊張脩所疾殺嵩痛之杖劍直入脩營殺十餘人幾獲脩死陳調少尙遊俠聞固死聚賓客百餘人攻脩大破之進攻脩營乃與戰以傷死

渙渙龍宗振振麟趾文炳彬蔚漢之表軌

總讚二十五人也

述漢中人士

其陳術字申伯作者舊傳者也失其行事歷新城

魏興上庸三郡太守及錫光等不列也

穆姜温仁化繼爲親

穆姜安衆令程祗妻司隸校尉李法姊也

祗前妻有四子興敦觀豫穆姜生二子淮基祗亡興等憎惡姜姜視之愈厚其資給六子以長幼爲差衣服飲食凡百如之久興等感寤自知失子道詣南鄭獄受不愛親罪太守嘉之復除門戶常

以二月八月社致肉二十斤酒米各二斛六斗六子相化皆作令士五人州郡察舉基字稚業特雋逸爲南郡太守

泰瑛嚴明世範厥訓

泰瑛南鄭楊矩妻大鴻臚劉巨公女也有

四男二女矩亡教訓六子動有法矩長子元珍出行醉母十日不見之曰我在汝尙如此我亡何以帥羣弟子元珍叩頭謝過次子仲珍白母請客既至無賢者母怒責之仲珍乃革行交友賢人兄弟爲名士泰瑛之教流於三世四子才官隆於先人故時人爲語曰三苗舊校云闕止四珍復起

杜氏之教父母是遵

杜泰姬南鄭人趙宣妻也生七男七女若

元珪稚珪有望五人皆令德其教男也曰中人情性可上下也在其檢耳若放而不檢則入惡也昔西門豹佩韋以自寬宓子賤帶弦以自急故能改身之恆爲天下名士戒諸女及婦曰吾之姪身在平正順及其生也恩存於撫愛其長之也威儀以先後之禮貌

以左右之恭敬以監臨之懃恪以勸之孝順以內之忠信以發之  
是以皆成而無不善汝曹庶幾勿忘吾法也後七子皆辟命察舉  
牧州守郡而漢中太守南鄭令多與七子同歲季考上計無不脩  
敬泰姬執子孫當作禮

禮珪肅穆言存典韻

禮珪成固陳省妻也楊元珍之女生二男

長娶張度遼女惠英少娶荀氏皆貴家豪富從婢七八資財自富  
禮珪敕二婦曰吾先姑母師也常言聖賢必勞民者使之思善不  
勞則逸逸則不才吾家不爲貧也所以粗食急務者使知苦難備  
獨居時二婦再拜奉教從孫奉上微慢珪抑絕之感悟革行遭亂  
流行宗表欲見之必自嚴飾從子孫侍婢乃引見之曰此先姑法  
也四時祭祀自親養牲釀酒曰夫祭禮之尊也年八十九卒惠英  
亦有淑訓母師之行者也

文姬叡敏宗祀獲歆

文姬南鄭趙伯英妻太尉李固女也父爲



梁冀所免兄憲公季公罷官歸文姬歎曰李氏滅矣乃與二兄議  
匿弟燮父門生王成亡命徐州涕泣送之謂成曰託君以六尺之  
孤若李氏得嗣君之名義參於程杵矣久之遇赦燮得還行喪服  
闋勅之曰先公爲漢忠臣雖死之日猶生之年梁冀以族弟幸濟  
豈非天乎慎勿有一言加梁氏加梁氏則連主上是又掇禍也奉  
行之從成在徐州各異處傭賃而私相往來成病亡燮四時祭之  
陳氏二謙或智或仁 陳順謙成固人也順謙適鄧令曹寧十九

寡居長育遺孤八十餘卒兄子陳規著書歎述之惠謙適張亮則  
在扶風官下吏白欲重禁嚴防以肅非元脩訪於惠謙惠謙曰恢  
弘德教養廉免恥五刑三千蓋亦多矣又何加也兄子伯思學仙  
道惠謙戒之曰君子疾沒世而不稱不患年不長也且夫神仙愚  
惑如繫風捕影非可得也伯思乃止陳伯臺稱云女尙書之後耳

當作俊末  
耳字衍文